

道古堂文集

道古堂文集卷二十五

仁和 杭世駿 大宗撰

考 贊 銘 箴

漢爵考

劉劭爵制曰古者天子寄軍政於六卿居則以田警則以戰啓伐有扈召六卿大夫之在軍爲將周之六卿亦以居軍在國則以比長閭胥族師黨正州長鄉大夫爲稱在軍則以卒伍司馬將軍爲號商君依古制備其法品爲十八級合關內侯列侯凡二十等其在軍賜爵爲等級其帥人皆更卒也有功賜爵則在軍吏之例

按春秋時秦爵卽有庶長左更之號商君特正其級  
非制其號也漢初起有執圭執帛上聞之號以賜功  
臣後廼專用二十爵

一爵曰公士 爵制曰古者以車戰兵車一乘步卒七  
十二人分翼左右車大夫在左御者處中勇士居右凡  
七十五人公士者步卒之有爵爲公士者也顏師古注  
百官表曰言有爵命異於士卒故稱公士也劉澤傳哀  
帝封澤元  
孫之孫無終公士  
歸生爲營陵侯

二爵曰上造 爵制曰造成也古者成士升于司徒曰  
造士雖依此名皆步卒也顏氏曰言有成命于上也

三爵曰簪褭 爵制曰御駟馬者要褭古之名馬也駕  
駟馬者其形似簪故曰簪褭也顏氏曰以組帶馬曰褭  
簪褭者言飾此馬也

四爵曰不更 爵制曰不更者爲車右不復與更卒同  
也顏氏曰言不豫更卒之事也

五爵曰大夫 爵制曰大夫者在車左者也顏氏曰列  
位從大夫高紀五年詔軍吏卒會赦其亡罪而  
亡爵及不滿大夫者皆賜爵爲大夫

六爵曰官大夫七爵曰公大夫 顏氏曰大夫加官公  
者示稍尊也樊噲傳賜爵國大夫文穎曰卽官大夫又  
賜爵列大夫文穎曰卽公大夫曹參傳賜  
爵七大夫遷爲五大夫七大夫卽公  
大夫夏侯嬰灌嬰皆賜爵七大夫

八爵曰公乘 爵制曰公乘者軍吏之爵最高者也雖

非臨戰得公乘車故曰公乘也顏氏曰公乘言其得乘

公家之車也

史記倉公傳有公乘楊慶公乘項處後漢明紀爵過公乘得移與子若同產同產子

注曰漢制賜爵自公土已上不

得過公乘故過者得移授也

九爵曰五大夫

爵制曰皆軍吏也

自六爵至九爵

又曰自一

爵以上至不更四等皆士也大夫以上至五大夫五等

比大夫也九等依九命之義顏氏曰五大夫大夫之尊

也

史記楊僕傳集解引漢書音義曰千夫若五大夫武帝軍用不足令民出錢穀爲之惠紀卽位詔太子御

驂乘賜爵五大夫宣紀元康元年賜勤事吏中二千石

臣下至六百石爵白中郎吏至五大夫五鳳五年皇太

子冠賜列侯嗣子爵五大夫元紀永光元年賜吏六百

石以上爵五大夫竟寧元年賜列侯嗣子爵五大夫周

勃樊噲夏侯嬰傳  
皆賜爵五大夫

按秦有五大夫王陵太史公自序司馬喜爲五大夫

十爵曰左庶長十一爵曰右庶長 顏氏曰言爲衆列

之長也

武紀元狩元年立皇太子宣紀地節三年元紀初元元年皆賜中二千石爵右庶長

按春秋有秦庶長無地庶長鼂孝公以衛鞅爲左庶

長惠文王以樗里疾爲庶長昭王以白起王齕爲左

庶長此庶長之見於遷史者也漢西南夷傳陳立爲

巴郡太守賜爵左庶長卜式傳賜爵左庶長霍去病

傳賜校尉從至小月氏爵左庶長

十二爵曰左更十三爵曰中更十四爵曰右更 爵制

曰所將皆庶人更卒故以庶更為名顏氏曰更言主領

更卒部其役使也宣紀本始元年賜吏二千石諸侯相下至中都官宦吏六百石爵名有差

自左更至五大夫

按秦白起為左更樛里疾為右更

十五爵曰少上造十六爵曰大上造顏氏曰言皆主

上造之士也

按史記商鞅列傳孝公以鞅為大良造索隱曰即大

上造也今云良造者或後變其名耳又白起犀首皆

為大良造

十七爵曰駟車庶長顏氏曰言乘駟馬之車而為衆

長也

十八爵曰大庶長 爵制曰自左庶長已上至大庶長  
皆卿大夫皆軍將也大庶長卽大將軍也左右庶長卽  
左右偏裨將軍也又曰自左庶長以上至大庶長九卿  
之義也

衛青傳校尉徐  
自爲爵大庶長

十九爵曰關內侯 爵制曰關內侯者依古圻內子男  
之義也秦都山西以關內爲王畿故曰關內侯也如淳  
曰列侯出關就國侯但爵身其有家累者與之關內之  
邑食其租稅續漢百官志曰關內侯無土寄食所縣民  
租多少各有戶數爲限



按管子小匡篇齊桓公存魯封衛皆執玉以見請爲  
關內之侯史記春申君列傳上書秦昭王曰韓必爲  
關內之侯魏亦關內侯在秦之先已有此號昭紀賜  
大鴻臚田廣明爵關內侯宜紀賜蘇武劉德爵關內  
侯食邑張晏曰舊關內侯無邑以蘇武守節外國劉  
德宗室俊彥故特令食邑晏此說其實不然蕭何傳  
因鄂千秋故所食關內侯邑二千戶封爲安平侯劉  
敬傳封敬二千戶爲關內侯黥布傳封薛公千戶索  
隱曰劉氏云薛公得封千戶蓋關內侯也武帝時將  
軍李沮李息校尉豆如意

衛青傳

騎士孟已漁陽太守

解霍去病傳李敢李廣傳右師譚息夫躬傳左伊秩皆匈奴傳皆以

關內侯食邑不自蘇武劉德始也後若夏侯勝金安

上金日磾傳張賀孤孫霸張安世傳陳湯韋賢韋賞蕭望之馮

奉世常侍閎衛尉長成紀張禹鄭寬中師丹董賢等不

可勝數又平紀元始二年賜故曲周侯酈商等後元

孫酈友明等百一十三人爵關內侯食邑各有差孫公

宏傳元始中修功臣後賜宏後子孫之次見爲適者爵關內侯食邑三百戶

二十爵曰徹侯百官公卿表曰徹侯金印紫綬避武

帝諱曰通侯或曰列侯爵制曰列侯者依古列國諸侯

之義也貨殖傳曰秦漢之制列侯封君食租稅歲率戶

二百千戶之君則二十萬朝覲聘享出其中續漢百官

志曰功大者食縣小者食鄉亭得臣其所食吏民

晉書地理

志獻帝建安元年曹操封費亭侯魏文帝黃初三年初制封王之庶子爲卿公嗣王之庶子爲侯公侯之庶子爲亭

伯

漢承秦制有賜爵之令應劭以爲爵一級直錢二千顏

師古以爲本以斬敵一首拜爵一級故謂一首爲一級

西漢賜民爵者凡二十九次不過一級惟勤事吏得賜

二級宣帝神爵四年以黃霸有異政賜潁川吏民有行

義者爵人二級若行幸河東祀后土則賜汾陰民

元初元四年

年成永行幸甘泉郊泰時則賜雲陽民

元初元元年永始元年成永始

元立皇太子及皇太子冠則賜天下長子爲父後者及

當爲父後者

顏氏曰雖非已生正嫡但爲後者即得賜爵

間又賜女子百戶

牛酒

姚察顏師古皆以爲賜爵者之妻章懷以爲此謂女戶頭即今之女戶也

東漢賜民爵

者凡二十一次皆二級

惟光武建武三年一級明帝永平十六年三級

而三老

孝弟力田人三級流人無名數欲占者一級自桓至獻

六十餘年之間恩賚不行建安二十年立貴人曹氏爲

皇后乃稍賜爵然亦厯矣惠帝元年民有罪得買爵三

十級以免死罪文帝從鼂錯之言令民入粟邊六百石

爵上造稍增至四千石爲五大夫萬二千石爲大庶長

各以多少級數爲差

此本食貨志據本紀在五年

孝景二年上郡以

西旱復修賣爵令而裁其賈以招民

未審其數

武帝元朔六

年詔受爵賞而欲移賣者無所流貶其議爲令有司請

令民得買爵及贖禁錮免減罪請置賞官命曰武功爵

一級曰造士二級曰閑輿衛三級曰良士四級曰元戎

士五級曰官首六級曰秉鐸七級曰千夫八級曰樂卿

九級曰執戎十級曰左庶長十一級曰軍衛

臣瓚引茂陵中書云

級十七萬凡置三十餘萬金

史記索隱曰大顏曰一金萬錢也計十一級級十七

萬合百八十七萬金而此云三十餘萬金其數必有誤者顏氏案或解云初一級十七萬自此已上每級加二萬至十七級合成三十七萬也劉攽刊誤曰或謂七當作一予謂賣爵當級級稍增其價豈可例云級十七萬比至三十餘萬金則一萬七千諸買武功爵官首者試餘級又非也然則誤衍此萬字

補吏先除千夫如五大夫其有罪又減二等爵得至樂卿以顯軍功成帝鴻嘉三年令吏民得賣爵賈級千錢永始二年詔吏民以義收貧民入穀物助縣官振贍者已賜直其百萬已上加賜爵右更三十萬已上賜爵五大夫至獻帝建安二十年曹操置名號侯爵十八級關中侯爵十七級皆金印紫授又置關內外侯十六級銅印龜紐墨綬五大夫十五級銅印環紐亦墨綬皆不食租與舊列侯關內侯凡六等以賞軍功

裴松之注魏志以爲今之虛封

蓋自此始

景教續考

錢氏作景教考曰大秦曰回回曰末尼大秦則范蔚宗  
已爲立傳末尼因回回以入中國獨回回之教種族蔓  
衍士大夫且有慕而從之者其在唐時史固稱其創邸  
第佛祠或伏甲其間數出中渭橋與軍人格鬪奪含光  
門魚契走城外而摩尼至京師歲往來西市商賈頗與  
囊橐爲姦李文饒亦稱其挾邪作蠱浸淫宇內則其可  
絕者匪特非我族類而已作景教續考

回回之先卽默德那國國王穆罕默德

四譯館考作生謨罕慕德

而靈異臣服西域諸國尊爲別諳援爾華言天使也而

天方古史稱阿丹奉真宰明諭定名定制傳及後世千餘載後洪水泛濫有大聖努海受命治世使其徒衆四方治水因有人焉此去阿丹降世之初蓋二千餘歲後世之習清真之教者乃更衍其說曰阿丹傳施師師傳努海傳易卜刺欣欣傳易司馬儀儀傳母撒撒傳達五德德傳爾撒爾撒不得其傳六百年而後穆罕默德生命曰哈聽猶言封印云按唐之回紇卽今之回回回紇之先爲匈奴元魏時號高車或曰敕勒曰鐵勒其見於魏收李延壽宋祁之史者班班可攷異端之徒創爲荒忽幽怪之談以欺世而眩俗如天方古史云云者其



尤可軒渠者也又言國中有佛經三十藏自阿丹至爾

撒凡得百十有四部如討刺特

降與母撒之經名

則逋爾

降與達五

德之經名

引支勒

降與爾撒之經名

皆經之最大者自穆罕默德按

經六千六百六十六章名曰甫爾加尼此外爲今清真

所誦習者又有古爾阿尼之寶命真經特福西爾噶最

之噶最真經特福西爾咱吸堤之咱希德真經特福西

爾白索義爾之大觀真經密邇索德之道行推原經勒

瓦一合之昭微經特卜綏爾之大觀經侏侑昧任不可

窮詰而其隸在四譯館者同回特爲八館之首問之則

云書兼篆楷草西洋若土魯番天方撒馬兒罕占城日

本真臘瓜哇滿刺加諸國皆用之夫篆楷草爲吾中國  
書法之次第其徒特借以神其誕幻而顧倒道而行迂  
道而說以爲得天之明諭噫是何其無忌憚之甚也今  
以其教之在中國者而考之隋開皇中國人撒哈八撒  
阿的幹思葛始以其教來故明初用回回歷其法亦起  
自開皇至唐元和初回紇再朝獻始以摩尼至其法日  
晏食飲水茹葷屏湏酪見新唐書回紇傳二年正月庚子請於  
河南府太原府置摩尼寺許之見舊唐書憲宗紀明洪武時大  
將入燕都得秘藏之書數十百冊稱乾方先聖之書中  
國無解其文者高祖勅翰林編修馬沙亦黑馬哈麻譯

之而同回之教遂盤互於中土而不可復遣矣至於天  
方則古筠沖地舊名天堂又名西域其國本與回同爲  
鄰明宣德間乃始入貢而今之清真禮拜寺遂合而一  
之念禮齋課朝五之類月無虛夕異言奇服招搖過市  
而恬然不以爲怪其亦可謂不齒之民也已

唐天策府十八學士像贊

太宗旣平寇亂畱意儒學於宮城西起文學館以待四方文士尋遣圖其狀貌題其名字爵里命褚亮爲之贊號十八學士寫真圖藏之書府以彰禮賢之重也考舊史列傳有亮贊者凡五人曰杜曰房曰姚思廉曰蘇世長曰孔穎達餘不可考矣特爲贊補之曰

建平文雅包身之周軍國多務剖斷若流聰明識達臺閣所諏丹青示信名無與儔臨淄藻翰千里如面任當蕭何嘉謀克建文約體賔優游應變思入機神永終隆眷永興德蔚其詞華穠陽翟博覽諷議從容名高五絕

禮別七宗焜煌碑版想見筆蹤簡之良史續成父志大  
節臨危餘風勵世允恭編晉梁事明備耻教宮人卓焉  
自異鄭州趙州冠姓自出倉曹明譜長史正術輔道青  
宮黎陽領職諫苑鏗鏘允立臣則長雛奮翮鵠雛振羽  
薛氏翩翩耀我文圃相時令弟勗亦名父典籤述職補  
闕無誤一代儒宗推陸孔蓋隨端立義三教一槩經術  
洽孰正義斯在以多問寡夙仰神解名長意短武功是  
有正色匪躬不惟尙口廟堂述作高陽稱首惜哉黷貨  
易名滋醜惟此學海導源河汾宏宣舊制校理秘文經  
緯皇路集成大勲千載而下尙其誦芬

遂初老人像贊

老人字逸度遂初其號也家金陵國初來杭隱東郭之艮山賣藥自給卒年八十有五吳處士穎芳傳畧云老人晦迹匿名棄家遠遯爲挾崑山李氏子同竄以伯季呼故姓李來南故名南然非真姓名疾革時子嘉錫跪請宗姓所自及名字瞋目叱之終不言故其子孫懵不知自何氏也老人不與世接往來遺民佚老徐堅石施蕙農數人而已穎芳得見金翁厚餘徐堅石弟子也聞之於師云老人是徐中山後人先人復系於外家呂氏官韶州司馬遘國難間關至此詩歌抑塞磊落可嗟

可泣多不存其存者楚歸吟一卷邨居漫興一卷前後  
梅花二百咏

耻賊闖與同姓李寒石所以易李而姓理偕李氏以行  
遞徐司馬所以易徐而姓李繫心迹之不同遂一往而  
各行其是悼覆轍於南都忿孔王之僨事裂冠冕於韶  
州甘窮鄉而之死嗟醫國之無方長埋照於藥市異汶  
社之遺民非西山之義士嗚呼此勝國之孤臣中山之  
肖子

說劍圖贊

光祿王君冲素學道以妖嬈爲伐性之斧也寫說劍圖

以寓意屬予爲贊贊曰

劍以嬰兒子其事始越絕邪鑄音擊刺兵衍會稽術夸  
者巧附會仙俠兩嘯唳吾讀道家言靈劍乃丹訣女丁  
閒婦王陶冶火蓮埃奮椎令飛廉裝炭驅太乙利於宿  
柔鋌堅似牽口鐵慧鋒朗澄觀智刃肯剗截眇靖敗道  
質影組恣輕娥曲裾斜交輪諸于繡褙裾文屣劣容躡  
雲髮不待揲手中綠龜鱗環環儷削室曼臉長廻羞弱  
腕競揚擎王褒狂道士命門守雌一呼吸函黃庭蚤晚  
致青節害馬捐女戎真宰奉鬼律以劍喻非劍逃矣莊  
叟說我貪世間樂未與素女決容成陰道慳孔子閉房



缺作歌擬參同達者肆一呌

王氏像贊

歲己未蕭然斗山王君奉其兩先人遺像踵予門流涕而請曰微顯闡幽良史之職業先子蚤棄諸孤愚昆弟無似非母氏以鞠以教曷以冀於有立庶先生假之一辭則先世懿範其附金石以壽余重哀其意系之辭曰固陵毓奇鄉國引重天衢未亨席珍待貢早世潛神不伸其用道風孔彰遺書甚衆諸孤愴恨左髦不抗母也兼師翼之使長蔚爲國華世所宏獎靈枝迭枯兩桂猶旺襟期旣契獲瞻遺容家聲克繼慰安泉宮梧楸不忘

俎豆聿崇憑此惇史以煒管彤

粵西黃景庵像贊

編修明懿之父

惟德無方因心著跡惻舒通闊緣情以宅古稱和緩亦  
曰咸鉤寶此鴻術玉字紫書故有仁恕博愛之性而含  
生託其命有宣暢曲解之智而芸物遂其正夫其善氣  
迎人誠効著節天啟其功鬼芟其額所謂詣極淳華道  
存輔燮豈與廣漢審諦六微梁邱較量九折者邪

沈在川像贊

奇書幾卷叩竹一枝沖情遠抱孰能磷緇散帶衡門謹  
謝俗獎青松白雲空山獨往春非我春秋非我秋恬愉

自得

四字見素問上古天真論篇

與造化遊

先府君像贊

翳惟我公禮塗義府十五失恃廢著從賈太公番番邁  
病危苦據梧而呻日俟雞脯衝泥走雨懷肉歸煦厚夜  
永終棺寄僧國風鑿摧楹題湊蹶踣魂其有靈入夢來  
告荒郊號奔果符所錄陟彼硯矣行營佳城石屋之陽  
距一牛鳴攀柏灑淚掘土裹襟幽竈用妥銘其泉扃時  
已踰冠折節媚學六籍旣融七緯亦倬補苴闕亡評釋  
躋駁仰屋著書不事表暴女弟嬋媛蚤喪厥偶攜孤大  
歸襟不蓋肘築樓居貞恭進芳粦崇臺書名王府則有

隱德不曜澗阿考槃澤蘭谷松長葆歲寒小子無似狀  
公大端告于賢哲咏德勿諼

水月老人像贊

范忠貞公百步塘碑記百步塘有屋三楹老人所  
居也老人姓孫名文號水月一字文石越之會稽  
人間其年默不對有所與雖一介不顧食則脫粟  
衣惟布苧言論娓娓不倦少拂意亦終日無一言  
好爲長短歌詞所遊幾半天下卜居仁和垂四十  
年余奉 命撫浙暇過水月所居與之語真樸無  
僞翛然物外詢其居一廛一瓦悉自價售余爲之

捐俸薪築石塘名曰百步便行旅也

疏食藜羹安分常足凡衣愚帽隨俗不遷詩以抱山而富志因守道而堅郭外執農桑之業山中養草木之年軒冕或臨不必鑿坏而趨征徭偶及亦可閉戶自全或以爲不夷不惠之曼倩或以爲中倫中慮之少連采薇蕨而登山耻稱義士違邦族而東渡庶號寓賢名雖未入魯國先賢之傳行足以光 聖朝逸民之編質諸百世然乎不然

散花龕銘

智光居士闢後圃得隙地躬蒔雜蘂玩其生意誅茆兩  
楹夾花而處從之橫之不盈十笏地而休老棲逸之途  
將於是乎托焉凡一葉之敷榮一幹之蒼鬱一風一雨  
之生養摧落皆可以心數而掌計於時居士方抱幽憂  
之疾煩醒噫亂寂寞而無所試其檣格者葭棼者瀏莅  
卉歛榮有與爲喜凋有與爲戚壹若友朋親串之與吾  
素相熟習歷晦明弦望而獨與之相終始俗慮以祛道  
心日生可無記乎爲之樹其眉曰散花下菰姚世鉅書  
之而居士自爲銘銘曰

低枝姪姪密朶錯瑯是花非花非散亦散百結珠瓔四  
垂錦幔文室恒嫺春風獨旦蟬咽疎林魚跳碧瀾葉動  
鳥驚影翻蝶亂借月呈妍移陰就翫六枳籬深九光鐙  
爛扶嬌不起飛英似竄朋比華裯縱橫青案漉酒南垞  
捶栗北埤淺竿增波哀弦比歎旋刮金龜頻移黛椀孕  
艷凝苞含香立榦弄水畱光吹衣刺繡夕對晨敷起予  
清瘡

秋聲館銘

秋聲館用陶穀清異錄中語也符子南竹居之銘曰  
居士築室因兩桐樹非風而風非雨而雨綠雲不收赤

鳥欲死晨光漏穿如小梧子白藏司律寂寥淒清涼飈  
墮葉空階一鳴童子開戶不見其處明河星稀幽砌蛩  
語蕭蕭短檠美人獨居竹鑪烹泉還讀我書

桂堂銘

水漲一灣桂馨一山步櫺四周老屋三間軒窗疏豁風  
月不關因風獨往抱月而還游神懷葛尋樂孔顏交慎  
成貴事省得閒長吟抱鄰覓句仍刪桂兮桂兮高不可  
攀

藻綠軒銘

甲乙之石可以坐鳥庚辛之檻可以呼魚魚闌萍而天



破鳥移樹而巖虛美軒楹之窈窕富文史之佃漁或據  
梧而操縵宜臨池而學書筆非花而散藻人異月而懷  
珠花影臨窻而常倒枝流經壑而非迂莊叟濠梁無其  
至樂宣尼川上有此客與聊模山而範水希川觀而巖  
居

醉道士銅鎮紙銘

醉道士守谷神老不死吁嗟載籍非糟邱焉得供子長  
拍浮

杖銘

德不孤挈子俱爾不我扶吾將安適乎

賜硯銘

出自天府珍逾瑤琨校書天祿背不昏翩然謫墮歸蓬  
門榮光夜夜燭九闌

桂堂著書硯銘

以方爲體以靜爲德我言嘒嘒爾獨墨墨

詩硯銘

興來情往將於汝乎役天寒水凍將於汝乎炙言之不  
從不汝責

隱拙齋箴

沈廉使菽林以隱拙名其齋卽以齋名其集求余一箴以施屋壁其辭曰

九卿四至巧宦不躡方輪直轂良造莫試咄哉沈生以拙得名寓巧於拙其巧莫京用以事親子舍斷斷溫冬清夏定昏省晨用以閑家新舊孔嘉蒸梨自熟食鶩不哇用以誦讀千徧義足五經跪陳十史手錄用以撰述端此心術嘉謨洋洋德音秩秩用以入世惟力是視疑事毋質苟得勿事用以治屋庭階清肅睽孤者石臃腫者木入座之賓匪仁莫親稱詩之友小疵大醇以拙爲

基何施不宜本身身修奉職職治孚信僕隸綿歷年歲  
嬪子及孫暨於世世我尙口膝願學未能敬撰拙辭箴  
我友朋

道古堂文集卷二十六

仁和 杭世駿 大宗撰

跋一

南軒易繫辭說跋

南軒張侍講著繫辭說二卷至元壬辰魯人東泉王公分司廉訪章貢等路以伊川易傳特闕繫辭乃命贛州路總管府吳將仕刊之學宮與程氏傳大字舊本並行儒學學正權管學事胡順父和卿爲之序此本世所罕見明儒修大全吾邑張彥陵輯說統皆嘗引用其說予得之於汪西亭比部家西亭汲古之士其所藏宋元經

說尤多

## 易序叢書跋

右開封趙汝楫著寶祐丁巳福葛中序稱其用力於此者蓋二十四年當時已板行之考汝楫爲觀文殿學士善湘季子又丞相史彌遠壻嘗知吾浙婺州瑞安兩府仕至戶部侍郎善湘所著周易約說五書已載宋史汝楫亦明象數自言得之庭訓爲多其輯聞六卷及易雅筮宗通志堂刻之經解惟此書世所罕傳竹垞朱氏謂卽輯三書漁洋王氏謂卽易雅以今本較之惟首列易雅及筮宗三卷以後爲深衣考爲律本義爲周尺記爲八陳通記爲如意城畧爲六日七分論爲辨方圖爲納

甲辨合十卷朱王兩氏所言以臆斷也方善湘制置江  
淮時屢有展地之賞陳記城畧或試之有効抑彌遠爲  
之奧援也汝棣晚歲以理財進頗爲清議所擯要其人  
亦有意用世者論說固不可并廢云



周易衍義跋

右爲元將仕佐郎南康路儒學致仕教授深溪胡震著  
書成於大德乙巳震旣歿十餘年子光大纂輯成編其  
書多出已意不引用先儒之說雜論後代史事疏通證  
明謂修齊治平之本皆不外乎此而程朱張楊之旨未  
嘗不合震自言少讀易於國正何先生子舉編修劉先  
生均堂饒先生魯之門其淵源蓋有所自此本舊藏樵  
李曹氏輾轉歸有力家余亟謀錄其副而識其大旨若  
此

周易程朱傳義折衷跋

右爲元潼川趙采述采字德亮號隆齋其書發明程朱兼用康節之說本義解用九言凡筮得陽爻者皆用九而不用七蓋諸卦百九十二陽爻之通例也說本之歐公采以爲用九是變卦乾六爻都變則爲坤便是元亨利牝馬之貞頭變而身不變似无首底龍用九用六歐公得之又言自古帝王皆以九致治如舜之命九官禹以六府三事允治九乃天數之全是以聖人於中庸則三陳九經於乾則三陳用九采之發明類此其說可以補語類中間荅之所不及明初儒臣纂大全時多未見

其書蓋亦紫陽之冢嫡也

周易辨錄跋

富平楊公柵山先生在明世廟時以山東道監察御史  
言事下請室與孫公繼魯以磁畫壁倡子和汝集名破  
碗蓋憂患而不失其正焉圓扉之中日讀周易以自排  
遣撰六十四卦之說爲辨錄四卷書成則嘉靖乙巳也  
夫公畢命遂志直聲滿天下其說明夷云視其窘辱若  
固有之而心若樂受又云剛忿以重其困隕穫而喪其  
心則失之遠矣卽可以見公自信之學詩云惟其有之  
是以似之其不媿也已隆慶二年此書嘗刻關中有東  
郡楊魏序刊本不獲覩得舊鈔於就李遂錄而藏之以

志吾景仰也

初學尙書詳解跋

解凡十三卷宋前臨江軍軍學教授廬陵胡士行編句  
解字釋明易可曉所引者呂氏夏氏林氏三家之說耳  
其於名物象數尤極精晰如六宗九章三江九江之類  
兼列同異以蒙求通俗文之例釋之題曰初學意蓋謂  
此通志堂刻經解乃刪去首二字可謂鹵莽矣

蔡氏傳旁通跋

稱至治元年辛酉東滙澤陳師凱撰傳六卷衍之爲十一不錄尙書全文有得則錯舉附注其下蓋用陸博士釋文例蔡傳旣列學宮爲經生家所誦習則此書安可不附刻于後通志堂雖以之入經解然學士之能寓目者蓋寡

御定書說彙纂取而類入之嘉惠後學大矣此本尙爲元刻首簡一行云豫章朱萬初校正卷末一行云至治乙酉崇化余志安勤有堂印行徐氏底稿蓋用此今則削去不錄而原刻之面目亡矣

古文尙書疏證跋

信古文尙書爲真者蕭山毛簡討奇齡之寃詞也疑古文尙書爲僞者太原閻徵君百詩之疏證也兩家之論旣如方圓柄鑿之不相入各就所見縱橫穿穴論辨亦雄矣哉寃詞旣刊之西河合集獨疏證五卷世鮮傳本康熙壬寅予得第一卷於繡谷吳氏雍正癸卯復得四五兩卷於錢塘龔明水書凡八十篇自十七以訖四十八竟無由獲睹其全可爲繫息徵君每於卷末各有自跋其第一卷旣寫成癸亥秋泊武進郭外舟忽覆私念疏證雖多副本在京師然未若此本爲定當邀東坡元



符三年破宿大海中例以濟其寫第四卷別錄四本一  
寄置太華山頂友人王弼撰司之一寄羅浮山應某處  
士之請其二本則寄千頃堂傳是樓之主人倣白氏文  
集家藏外別錄三本例其寫第五卷成年五十有三屬  
閩謝氏寫圖一一禮堂寫定圖一傳與其人圖藏諸丙  
舍秋山紅樹閣本鄭康成疾篤戒子書意徵君自信之  
篤如此子特爲傳鈔二本廣陵則馬君涉江有副墨錢  
塘則趙君谷林置篋衍兩家皆振奇汲古之士質徵君  
於九原當啞然首肯也

周禮集說跋

雲山沈則正得周禮集說於雪以爲其書似呂氏詩記及書集傳以示吳興陳友仁君復君復更益以賈氏王氏之疏說凡例綱領而外總十有二卷其書以注疏爲主益以介甫橫渠東萊晦菴南軒暨陳君舉鄭敬仲諸論諸君不盡注周禮於語錄文集掇拾其緒餘可謂博觀約取矣第四卷爲關中劉儲秀編補末卷乃復古編謂周禮得於秦火之後官宜少不宜羨今天官及春夏二官之羨者九地官之羨者十有六秋官之羨者五從其羨而求之冬官皆不亡又謂大司空小司空雜出於

別官蓋祖述俞廷椿邱葵之意書成於至正戊子稱吳  
興前谿今歸安所轄成化間刊於建陽書院則聞撫張  
瑄也

春秋經傳類對賦跋

類左氏傳爲對語者宋人凡三家其二見之宋史曰毛友左傳類對賦曰不知作者魯史分門類對賦今皆不傳其一見於困學紀聞曰李宗道春秋十賦王深寧嘗摘錄其警語而稱其屬對之工然其全者末由覲矣徐晉卿此賦獨不見列於前志在三家之外得以僅存豈非幸哉然此爲詞學屬對之書當入類家不當列之經解通志堂取而刊之過矣

契丹國志跋

契丹國志二十七卷淳熙七年秘書丞葉隆禮表進其  
劉六符耶律余覲諸傳及諸番雜記全襲洪氏松漠紀  
聞晉出帝降表暨東丹王傳又割五代史以成文其與  
他書異者唯王沂公富鄭公行程諸錄文獻通考雖載  
其目而其書已亡得此爲不墜於地至胡嶠陷北記五  
代史遼史間一稱引之此獨載其全爲可寶也

大金國志跋

首題宇文懋昭撰懋昭不見史冊其書似依倣葉氏契丹志爲之然鋪敘無史例書太祖創基與金史異儀衛道里諸篇直是抄撮北盟會編而成蓋僞書也

崇文總目跋

崇文總目凡六十六卷其序乃當時諸臣分撰歐公居士集中祇二十三類餘則無可考矣竹垞檢討謂刪去解題始於鄭夾漈作通志畧非也馬貴與撰通考王伯厚著玉海生後夾漈百餘年其書皆引證其說嘉定七年武夷蔡驥刻列女傳首簡亦引此書則知此書在宋時原未有闕後世傳鈔者畏其繁重乃率意刪去耳

直齋書錄解題跋

直齋吳興陳振孫二卿也不見宋史府縣志亦不載馬  
貴與全引之周密齊東野語云直齋嘗仕於莆傳錄夾  
漈鄭氏方氏林氏吳氏舊書至五萬一千一百八十餘  
卷近亦散失又淳祐己酉直齋修吳興人物志亦見野  
語



## 至治條例跋

右英宗卽位以來頒降條畫訖於至治二年而延祐七年之事亦備其中首列國典則登極改元太皇太后尊稱尊號以及誅阿撒等之詔書也次朝綱則中書省御史臺與公規也次吏部其目有四曰官制曰職制曰選格曰吏制次戶部其目有十曰祿廩曰鈔法曰倉庫曰錢糧曰課程曰賦役曰勸課曰田宅曰婚姻曰錢債次禮部其目有三曰禮制曰儒教曰釋道次兵部其目有二曰軍制曰驛站次刑部其目十有四曰刑制曰刑獄曰諸盜曰巡捕曰詐僞曰諸殺曰諸毆曰諸姦曰訴訟

曰贓賄曰雜犯曰人口曰頭疋曰刑禁次工部其目有二曰造作曰遞鋪有元初盛之律令格式如此不列作者姓氏亦非奉敕編纂意必當時臺部所輯吾友厲君太鴻嘗欲取以爲元史補遺嫌其語句多質俚不可入史志如稱俺稱呵如那裏如可憐見皆出自聖旨蓋據當日頒降原文未經儒臣潤色者然一代之制可因此以得其梗概矣

## 歷學新說跋

有明藩獻之著述獨鄭世子學得其正歷學新說一書  
宣城梅徵君定九稱其能言授時大統之同異得失以  
授時消分太驟稍爲之通間考春秋以來日食及史漢  
以後諸歷志所載以證其說明興三百年能深言授時  
法意者一人而已靈壽布衣朱仲福節錄其書改爲折  
中歷法徵君改爲歷學新說鈔平湖陸侍御率靈壽時  
求得其書爲板行之考之王氏玉海其於累代之歷源  
流因革卓有原本自漢譜十八家以迄兩宋更造之次  
第較是說所稱引不啻倍蓰過之則是書大密而小疎

也居嘗論之天官之與太史氏古出於一今出於二推步之術史官自馬遷李淳風而外皆非專門名家後漢後魏以及元史尤不免於剽襲司馬彪臚陳張衡諸家之說於造歷之原本疎魏收歷志二卷上卷河西歷則本之趙馭下卷永安歷則本之孫僧化已不能置一喙焉元史成於迫猝而歷法頗精然止全寫郭守敬授時歷而已史官所謂秉筆者安在乎明史歷志成於湯文正公而改于黃聘君黎洲頗載世子歷議數則梅徵君以爲稍見大意夫立成細草有其法而無其書日躔月離知其術而難爲狀文章之士而能通乎天官氏之學

其於作史也庶幾乎爾

通鑑地理通釋跋

不佞觀史於形勢割據間多所未諳一以浚儀王氏爲準的通釋一書七國之際貫串國策史記諸世家尤有法魏吳蜀之險塞六朝南北之重鎮分晰若指諸掌唐以後廼稍畧耳方密之撰通雅顧景范輯方輿紀要時竊取其說輒歎學人著書必有藍本深寧何嘗不用通典然有裁斷不蹈襲固非今人可希

水經注朱謀埠箋跋

鬱儀序稱與綏安謝耳伯婆源孫無撓其爲此書爲酈氏尋源采隱可謂淹雅士矣然無撓之言不能無誤注云穀水又東逕土嶠北所謂二嶠也按春秋正義俗呼爲土穀石穀其阨道在兩穀之間無撓以土嶠爲西嶠之誤是讀書猶未徧也